

Sopra le Nuore e le Madonne.

CANZONE XIX.

Di un poch voi aitre none  
 Rupie fin sul nas,  
 Tra nore e tra madone  
 S' a j' è mai stait la pas?  
 Di franch, e nen da farde,  
 Virè pa la frità,  
 Ch' i passe pr busiarde  
 S' i neghe sta vrità.  
 Ma pur pr nen buteve  
 An tanta confusion,  
 I veui nen obligheve  
 A descurvi ij pation;  
 Ste mach pr testimoni,  
 Lasseme a mi l' impegn,  
 Peui di ch' i son un Toui  
 S' i bato pa ant 'l segn.  
 Coui dontré di dle nosse  
 A fa pro ancor temp bel  
 Pr le facende grosse  
 Ch' a l' an da dè ciadel;  
 Passà ch' a l' è la festa,  
 I sommo a temporai,  
 E dlongh a la tempesta  
 Dij crussi, lande e guai.  
 A s' buto ste rognasse  
 A desse sugession,  
 Stasand marchè le casse  
 Con tuta aplicassion,

A stan an sentinela,  
 Comenso piè d' sospet,  
 A s' fan d' eui da crivela  
 Notandse i seu difet.

A s' guerno sempre a vista  
 Su tuti j' andament,  
 A van fasand la lista  
 Tenendse bin da ment;  
 A s' pio an difidensa  
 Giugandse dij sotman,  
 Con la benevolensa  
 Ch' a j' è tra gat e can.

Se coula nora fica  
 So nas ant quaich afè,  
 La veja subit pica,  
 A la fa ste andarè;  
 Prchè ch' a l' ha pagura  
 Ch' d' vote maraman  
 Ai peussa con dritura  
 Levè 'l cassul d' an man.

S' a sta marlait d' bada,  
 Na forma un bel concet.  
 Disend ch' a val pa un vada,  
 Mach bonna a tavo e let;  
 A passa pr mincionna  
 S' a menna pa 'l sarsat,  
 E pr na ciaciaronna  
 Ausand ampò 'l cacat.

S' a l' ha bonna ganassa.  
 A dis ch' a l' è afamà;  
 La trata da smorfiasa,  
 S' a l' è un tantin dlicà;  
 Rendendse solitaria,  
 A l' è d' umor sarvai,  
 Surtiand a piè ampò d' aria,  
 L' è pr scapè 'l travai.

S' a veul fè la sustosa,  
 A dis ch' a l' è tirà;  
 Mostrandse poch curosa,  
 A l' è dispensierà;  
 La tassa da bigota  
 S' a va piè quaich perdon,  
 E pr na mal devota  
 S' a spram nen i limon.

S' a va con polissia  
 Tenendse ampò ardrissà,  
 Coula Madona pia  
 Va fè la ciabrissà:  
 Ch' a l' è n' ambisiosonna,  
 Ch' a val pa un fi forà;  
 S' a s' lassa andè a la bonna,  
 Ch' a l' è una gran pondrà.

S' ai ved fè cortesia  
 Da l' omo o dal messè,  
 La rabia e gelosia  
 Ai fan gonfiè 'l gosè;  
 Vedend peui ch' a la lasso  
 Marlait a l' abandon,,  
 Tant pi s' a la sbramasso,  
 Oh che consolassion!

S' a feisso bin d' miraco  
 Le nore d' ogidi,  
 Tant le madone ai smaco,  
 E sempre ai treuvo a di;  
 Ai veulo pr servente,  
 E pr storcion dla ca,  
 E gnanch a son contente,  
 Ste teste sbusicà.

Venend a restè grosse  
 S' a torso un poch 'l col,  
 Ai diso ch' a son d' rosse  
 D' un natural trop mol;

S' a venno mai guastesse,  
 Ai buto sul mostass  
 Ch' a san pa regolesse,  
 Ch' a son d' bei ciaudronass.  
 Quand a comenso aveje  
 D' maraje da ciadlè,  
 Anlora si ch' le veje  
 A treuvo da gablè;  
 Disend ch' a son pro brave  
 E bin adutrinà  
 Pr anlevè dle crave,  
 Ma pa anlevè d' masnà.  
 Ampò d' armour ch' a fasso  
 Quand a son già sgrojà,  
 Le veje s' sganasso  
 A feje d' armangià;  
 Vorijne pa ch' a steisso  
 Ficà ant 'n scatolin,  
 E quasi ch' a bogeisso  
 Nepur un di marmlin?  
 S' ai vedo fè quaich gnogna,  
 A sauto com' d' cravieui,  
 A diso ch' la pussiogna  
 L' è lo ch' a guasta i fieui,  
 Ch' a venta pa ampasteje  
 D' parole con d' amel,  
 Ma ch' a l' è mei crieje  
 Tavota su la pel.  
 Le nore poch al viagi  
 Van arlevand ij pont,  
 Al vede sti meinagi  
 A buto dco bon front;  
 Tra tant a s' pio an ira,  
 Ma con un tal livor,  
 Ch' a j' è pi gnun ch' ai vira  
 A feje cambiè umor.

Ai ven pr consequensa,  
 Che peui continuament  
 Scapandie la pasiensa  
 A s' van tirand dij dent;  
 Scaudà fin ant le miole  
 Sautà ch' a l' an 'l fos,  
 A s' na dstaco d' coule,  
 Ch' a van giù fin ai os.  
 Con tute le comare,  
 Con tuti i seu parent,  
 Con tuti i seu compare,  
 Amis e conossent;  
 A fan sauté la minna  
 Contand le soe rason,  
 E sfogo la cagninna,  
 Dasend 'l feu al canon.  
 Saveisne pur contene  
 Pr desgonfiè 'l gavas,  
 Podeisne pur butene  
 An aria d' pataras;  
 Loli si ch' ai saria  
 D' un gran divertiment,  
 E squasi ch' i diria,  
 Pi d' mes so nutriment.  
 Da couste cioche rote  
 Chi veul gavè 'l costrut,  
 Quaich vota fan le bote,  
 E s' parlo nen d' autut.  
 E d' vote a braio d' j' ore  
 Com' d' anime danà,  
 Ch' a s' pio gust d' fè core  
 Tuta quanta la vsinà.  
 A van bin pro quaich festa,  
 Pr nen fè parlè d' lor,  
 A squintarnè la testa  
 Ai pover confessor;

Cos' ela peui an sostansa  
 Tuta sta confession ?  
 Nen aut ch' un' abondansa,  
 E sfogh d' mormorassion.  
 A studio mach d' pousse  
 Apres ai seu mari,  
 S' a peulo scavalchesse,  
 L'è tut so gran piasì;  
 Ai van gonfiand j' orie  
 Con sent iniquità,  
 E veulo che soe busie  
 A passo pr vrità.  
 Ma cousta l'è pi bela,  
 Quand j' oimo ai dan 'l tort,  
 Ataco una gabela  
 Criand ancor pi fort,  
 A pisto e piro d' rabia,  
 E fan un rabadan,  
 Ch' un ors ficà ant la gabia  
 Na fa pa n' autrstan.  
 Ai cario d' improperi,  
 Ai trato da faseui,  
 Ai creuvo d' vituperi,  
 Ai veulo gavè j' eui;  
 Loli si ch' ai tarissa,  
 Ch' ai fa cambiè color,  
 E tant sauté la stissa,  
 Ch' a resto fora d' lor.  
 Ognun peul bin comprende  
 Chi n' ha da stene d' mes,  
 A son peui le facende  
 Ch' a van da mal an pes;  
 La ca va tuta an aria  
 Pr so tirè e scianchè,  
 La roba va an pataria,  
 Loli peul pa manchè.

A j'è d' madone tante,  
 Che pr durmi soav  
 A veulo pa d' guarnante,  
 Pr tni tut lor sot ciav,  
 Pr tant che coula nora  
 S' a veul ch' un toch d' pan,  
 A s' pensa nen fè anfora  
 D' andeje al basaman.

A s' buto mai a tavo,  
 Nè a sinna, nè a disnè,  
 Che o j' une, o j' aitre gavo  
 Quaich landa da rinfnè;  
 A veulo ch' la ganassa  
 Travaja dopiament,  
 E cousti, bon pro fassa,  
 Tra lor son compliment.

Mi m' buto pa a la preuva  
 D' voleje intrè an question  
 Da quala banda a s' treuva  
 O 'l tort, o la rason;  
 Mi m' na veui pa ampaceme,  
 I son pa cosi fol,  
 Prchè i veui pa tireme  
 D' maledission a col.

S' ant j' oimo ai fuss giudissi,  
 Ma ch' a son trop bagian,  
 Levrio pro i caprissi  
 A sti servei tant van;  
 Ventria con ste streghe  
 Piè un bon baston a pr un,  
 E feje bin le freghe  
 A la matin a giun.